




...«Bota femërore» është frymëmarrje e kësaj jete e megjithatë ngulfaten të drejtat e saj! Ajo i jep nuanca shumëngjyrëshe përditshmërisë sonë dhe përjetëson jetën mbi glob e megjithatë globalisht jetën ia errësojnë! Më shumë këngë, më shumë respekt, më shumë liri, më shumë përkushtim, më shumë dashuri... për botën femërore.

- autori

MEHMET BISLIMI - LIRIKAT E FJETURA

MEHMET BISLIMI

# LIRIKAT E FJETURA



(POEZI)

*Mehmet Bislimi*  
LIRIKAT E FJETURA

**Mehmet Bislimi**

## **LIRIKAT E FJETURA**

Redaktor:

**Prof. Dr. Begzad Baliu**

Lektor:

**Emin Halimi**

Recensent:

**Adnan Asllani**

Kopertina dhe faqosja:

**Sabir Krasniqi**

Punimi në ballinë:

**Bryce**

Botues:

**PPG “Shkrola Print”**

**Prishtinë**

Copyright & 2013

**Autori**

**Mehmet Bislimi**

# **LIRIKAT E FJETURA**

**POEZI**



*... «Bota femërore» është frymëmarrje e kësaj jete e megjithatë ngulfaten të drejtat e saj! Ajo i jep nuanca shumëngjyrëshe përditshmërisë sonë dhe përjetëson jetën mbi glob e megjithatë globalisht jetën ia errësojnë! Më shumë këngë, më shumë respekt, më shumë liri, më shumë përkushtim, më shumë dashuri... për botën femërore.*

**- autori**



## **FJALA E REDAKTORIT**

### **Ironia e tekstit**

**Mehmet Bislimi, Lirikat e fjetura, Prishtinë, 2013.**

Dy dekadat e fundit letërsia shqiptare ka pasur prurje të pazakonshme në fushë të saj, si me numrin e autorëve ashtu edhe me numrin e veprave të shkruara dhe, madje edhe me numrin e veprave të përkthyer. Arsyet e këtyre prurje janë thënë jo njëherë dhe mund të tipologjizohen edhe më tej, si për modelin e ardhur nga radhët e shkrimtarëve ashtu edhe për prirjen semantike të veprave të shkruara a të përkthyer.

Shkrimtari Mehmet Bislimi është njëri prej krijuesve të dekadës së fundit, i cili shquhet për trashëgiminë jetësore të biografisë së tij, për modelin se si ka hyrë në letrat shqipe dhe për prurjet estetike të krijimtarisë së tij. Në letërsinë shqipe ai hyn me konceptet intelektuale të krijuesit, që në shoqërinë shqiptare ka sjellë më parë se sa mendimin kritik për letërsinë, mendimin kritik për lirinë e të qenit shqiptar. Duke i takuar radhës së atyre krijuesve që mendimin dhe angazhimin e tyre jetësor e



konsideronin mision, ai la mënjanë për shumë vjet anën shpirtërore subjektive deri në fund të Luftës çlirimtare të Kosovës. Por, kur misionin e tij si shumë pjesëtarë të Lëvizjes për Çlirimin e Kosovës e konsideroi të përmbyllur, së paku si një akt të dramës së madhe kombëtare, Mehmet Bislimi hapi portën e madhe shpirtërore dhe pse jo edhe mjeshtërinë e tij prej analisti, hulumtuesi, studiuesi, poeti dhe para se gjithash krijuesi letrar. Në këtë rrjedhë ai krahas poezisë botoi monografi për dëshmorët, vëllime me prozë të trashëgimisë popullore, vëllime me analiza politike të karakterit nacional etj. A mund të thuhet se kjo është arsyeja pse krijimtaria e tij letrare është pasuruar me veçori të letërsisë gojore dhe struktura të veçanta gjuhësore e semantike të lirikës së saj. Dhe pse të mos thuhet se kjo mund të jetë edhe premisa e një shtrese të përhershme etike me bazë në të menduarit tradicional, me të cilën shquhet gjithashtu një pjesë e poezisë së tij.

Vëllimit me poezi *Lirika të fjetura*, ju prinë një Hyrje jo shumë e zakonshme në fushë të letrave shqipe. I kujdesshëm që të mos trazojë zemrat e lexuesve të poezive të tij të fjetura ndër dorëshkrime zemre, ai bën një hyrje shpjeguese me të cilën dëshmon se këto poezi i janë kushtuar gjinisë tjetër, botës së urtë dhe të veçantë të saj, si dhe kujtesës që e përcjell respektin për të.

Vëllimi poetik me titull Lirikat e fjetura, është strukturuar nga një numër ciklesh dhe poezish, të cilat përveç me ndonjë esencë motivuese nuk shquhen për ndonjë nuancë tjetër stilistike, gjuhësore a metrike, prandaj ashtu sikur rrinë të ndara në cikle të shumta, ashtu edhe do të mundë të shquheshin si një tërësi tematike, stilistikore dhe perceptuese. Le të shohim në fillim vetëm strukturën motivore të fjalësit a togfjalëshit, me të cilët është bërë ndarja e cikleve poetike: *Ndjenjë e vakët, Aromë ftoi, Thyerje në pasqyrë, Epikë e përflakur, Lirikë shpirtërore, Falni lirikat, Atje ku nuk bie borë, Autorë të sakrifikuar, Hijet e shpirtit, Zanoret e bardha, Lirikat e fjetura dhe Kumbim kambanash*. Prej titujve të vënë nuk është vështirë të shihet jo vetëm mesazhi poetik por edhe simbolika e trashëguar e tabanit tradicional, qoftë e letërsisë popullore qoftë e letërsisë së shkruar, kryesisht rustikale, në njësitë leksikore: vakët, ftua, epikë, shpirt, përflakje, bardhë, fjetur, falje, kambanë; po edhe largim nga ajo: pasqyrë, sakrificë, zanore, hije shpirti etj., të cilat mjeshtri ynë i ka strukturuar me kujdes dhe me përkushtim të rrallë, si pak krijues të brezit të tij.

Diskutimi i poezisë së tij qoftë brenda cikleve, qoftë më vete, do të mundë të sillte një ide më të plotë për tërësinë estetike e konceptuar jo vetëm për një poezi, po edhe për tërësinë e saj.

Ato marrin nismë që nga kujtesa për sytë e një fëmije të mbushur dashuri, të rinia e mbarsur me ëndrra djaloshare e që fluturojnë mbi horizont dhe përmbyllen me ‘marrëzitë’ e moshës së bardhë. Poezitë e identifikuar kryesisht me përëmra, ëndrra, përkushtime personale, ndjenja të përzier, moshë, plagë zemre të ringjallura thellë në ndjenjat e një moshe të shtyrë etj., janë ato që e përcaktojnë përbërësin e motiveve, temave, ideve dhe mesazheve të përcjella me një pasuri shenjash dhe etiketash etike të traditës sonë. Të kësaj natyre janë poezitë *Asaj, Fotografia, Ka vite, Plagët, Brengë e vjetër, Kujtime, Moshë e vite, Pa dashje (një nga poezitë më të bukura të këtij vëllimi), Ëndërr e vjetër, Sorkadhes etj.*, si këto, me të cilat identifikohen jo vetëm motivet dhe ciklet e poezive, por edhe tërësia tematike dhe estetike e këtij vëllimi. Janë vargje të mallit dhe të kujtesës me të, për të cilat autori ynë që në fillim kërkon ndjesë, sepse:

*“nuk dua t’ia lëndo  
ëndrrat e saja të bardha  
me ndjenjat e mia të mallit të parë”,*

thekson në një nga poezitë e para, si për të plotësuar Parathënien e shkruar në hyrje të këtij vëllimi.

Krijues me dhunti të theksuar për përdorimin e humorit tradicional dhe sarkazmës letrare, Mehmet Bislimi është shquar në mënyrë të veçantë për përshtirjen e saj edhe në letërsinë artistike, në të vërtetë edhe në poezitë e kësaj përmbledhjeje. Si në pak vëllime të poezisë sonë këta përbërës letrarë të veshur në të shumtën e rasteve me vlera etike, të dala kur nga formulimet popullore e kur nga gjedha e shkruar filozofike, zënë vend të rëndësishëm, për të mos thënë, bëhen simbolika e strukturës poetike në poezinë e tij. Pa satirën, me të cilën e ka veshur pothuajse gjithë sistemin poetik të tij, vështirë se do të mundë të shquhej në këto përmasa universi vetjak i poezisë së Mehmet Bislimit, përkundrazi. Janë pikërisht këto vlera, të cilat e cilësojnë edhe Lirikën e fjetur, poezinë e kujtesës së vonuar a të rishfaqur dhe lirikën besoj më sublime të poetit të zbardhur ndër vite:

*“muzat e mesnatës me joshje  
në befasi i zura  
më lusnin që t’i falja  
jo  
nuk i fala  
në poezi i vura”*

Në të vërtetë, poezi të kësaj natyre a të këtyre motiveve, as nuk janë shkruar për herë të parë as nuk janë shkruar vetëm në gjuhën shqipe.

Por poezitë e krijuesit tonë janë të veçanta, sepse ato zhvillohen paralelisht në dy rrafshë: rrafshi i parë përshkohet përgjithësisht nga marrëzia e të qenit njeri i dashuruar, me vitet dhe me aktin dashuror, si një dukuri e përjetshme dhe më në fund si një faktor fiziologjik, që e bënë të qenësishme edhe sarkazmin; ndërsa rrafshi i dytë që zhvillohet pothuajse paralel me të parin, është vetëdija për ‘bëmat’ e narratorit dhe ndërrijen për kodin etik të kësaj bëme. Janë dy përmasa e paralele të dala mrekullueshëm nga ky krijues, për të cilat shpresoj të shkruaj një herë tjetër më gjerësisht.

Le të jetë prandaj kjo edhe vetëm njëra prej arsyeve pse sot mund të thuhet se autori i këtij vëllimi bën një hap cilësor në poezinë shqipe, në të vërtetë në afrimin e parametrave të traditës së poezisë shqipe me vlerat estetike të poezisë moderne të saj.

**Prishtinë, shkurt 2013**

**Prof.asoc. dr. Begzad BALIU**

## **NDJENJË E VAKËT**

## Asaj

kohë e largët  
ndjenjë e vakët  
lozonjare herë  
herë e saktë

kujtime të hershme rinore  
çastet të ëmbla përcjellë  
pa dashje  
ëndërr e mbështjellë  
si dhuratë  
më erdhe për shqetësim këtë natë  
më nxore djerset nga balli  
ëh  
ty lumi të marrtë  
ç'më paska djegë malli

## Atë

me syrin e arsyes e shikoja  
aritmë zemre  
rinumërim nga e para  
sprovë që më trembe  
nuk dua t'ia lëndo  
ëndrrat e saja të bardha  
me ndjenjat e mia të mallit të parë  
nuk lejoj  
ndjenjat nuk i fus në lojë  
as një herë  
atë  
nuk dua ta lëndo



## Një ëndërr

ëndrrat e bardha  
edhe në kohën e pleqërisë  
mes kujtimeve të venitura  
të mirëseardhura  
po  
ikën  
vitet e rinisë

në derën e vjetër prej druri  
ëndrrat  
me ndrojtje trokasin  
për lojën e lënë në gjysmë  
ëndrrat lozonjare  
prapë  
në derë na trokasin  
në orët e vona  
na kujtojnë  
s'na braktisin  
s'na harrojnë

## **Fotografia**

fotografi e saj  
përtej horizontit blu  
plagët e mbyllura rihapë  
kohëra të largëta rinore  
buzëqeshje e ngrirë  
si për inat  
kujtimet shprush  
edhe këtë natë  
me bengun e kafet  
në gushë

shumë kërkova e s' të gjeta  
në rrugët e pendimit  
një ndjenjë krejt e shpërthurë  
si ti askush  
edhe sot  
si dikur  
me bengun e kafet  
në gushë

## **Ka vite**

të mbyllen prapa murit  
butësi femërore  
kohë e ligë në theqafje  
të kishte ndrydhur  
e lënë pas dore

vrasje e rëndë në emër të moralit  
mëkat i paparë  
a vritet sorkadhja e malit  
që sjell plleshmërinë  
lojë me idhujt  
lojë e paskrupullt me Kodin Etik  
lojë me perëndinë

## **Pikëllim**

lajmi se ti nuk do vishë  
më erdhi nga andej telefoni  
gjumit i thash ik  
si ndër leqe  
në prehrin e pritjes  
vetmia më zuri  
ëh  
pritje me shije të keqe  
pelin në buzë më vuri

tani edhe kur cingëron telefoni  
nuk e hap më  
lajmin për mosardhjen tënde  
e mora vesh  
ka vite që pres një zile  
e nuk “cingëron” më  
asnjëri prej nesh  
a thua do na thërrasë dikush  
për të na thënë  
ndihuni  
se do ikim nga kjo jetë

## **Pritje**

me çiltërsinë e shpirtit  
pritën ato  
kthimin e burrave  
nga syrgjyni  
kurbeti  
burgu e mali

me flokun mbi supe  
si petkat e bardha larë  
në lotin e kripur  
kristal pritje ngrirë  
në gjoksin e tyre pesha e pritjes  
kallë  
si prapa derës së hekurt  
përnjëherësh  
dashuri e vuajtje  
ndryrë  
nga malli i pritjes  
kallë

## **Ta shpëtojmë dashurinë**

urëjtjen ta shtypim me gurë  
dashurinë ta shpëtojmë  
më pastaj do mblidhemi  
për të kërkuar  
rrënjën e atësisë  
kush ishte babai i urëjtjes  
dhe  
kush i dashurisë

luteni  
mos i hyni në hak njeriut  
as perëndisë  
dashuri falni botës  
jetë  
rini  
çiltërsi

## Vite

zili të kam  
mes shoqeve në garë  
bukuri  
që ndiqni njëra- tjetrën  
një jetë në radhë  
e reja ndoqi të vjetrën

e rëndë  
edhe në vitet e mia  
zemra s'më bënë  
të heq dorë  
nga rinia

**AROMË FTOI**



## Mungojnë

në odën e vjetër çiftelia  
ku trimi këndonte baladat  
mungon

në dhomën e nuses arka e saj  
aromë e ftoit ku ajo nusëronte  
mungon

nuse e dhëndër  
gjakun e lirisë Kosovë  
ta falen

e bardha e tokës sonë pjellore  
vellon tënde  
nuset e Kosovës  
në gji po e mbajnë  
rite dasmash  
në shkretni mos mbetshi  
Kosovë luadh i pjellorisë  
nuset tuaja erë ftoi  
gjakun e kuq ta rinojnë  
Kosovë  
dashuria jonë e përjetshme

## Plagët

mbi plagët e jetës mundimshëm  
bregun e lumturisë pushtuan  
lumturi e braktisur  
prapa mjegullës fsheh

shikimet e tyre ngrinë  
në agimin e parë  
gjethe ftoi  
shpërfillur mbi lëndinë  
rrezet e para të mëngjesit  
lotin e vesës shkrinë

butësisht heshtën ata  
vite me radhë  
me plagët e dashurisë në gjoks  
nuk u ankuan  
aromën e takimit të parë  
nuk e harruan

## **Smirëzi**

mirë  
ta zëmë  
sikur ata u ndanë  
u larguan  
dhe  
çka përfitoi bota  
nga vrasja e dashurisë  
veç  
shamisë së zisë

mbi fatkeqësinë e tjetrit  
mos ndieni kënaqësi  
ju të mallkuar  
ju smirëzi

## **Brengë e vjetër**

nga shpirti ynë  
sikur u shkëput diçka  
mungesën do ta ndjejmë gjatë  
hije e djegur  
brengë e vjetër  
një jetë  
kërkuan njeri tjetrin  
për të nxjerrë nga thellësi e shpirtit  
mllefin e fatit të djegur

## Dehje

në rrugët e pafundme  
joshur  
nga loja e dashurisë  
si të parët tanë dikur  
dehur nga ndjenjat  
e fshehura të djalërisë

arsyeja mbi ndjenjat  
të triumfojë  
dashurinë e singertë mos fshihni  
krejt njerëzishëm  
në rrugën e madhe të kësaj bote  
ndjenjat e dehura  
mos i vini në lojë

## **Zgjohu**

tund dheun  
forcërisht ngrihu nga fundi i botës  
merr rrugë  
njeriun tako  
njeriun dashuro  
me njeriun e sinqertë  
në rrugët e jetës  
udhëto

## **Për ty**

rrugët e jetës preva në mes  
këngën e pakënduar  
rifillova  
me zërin që gumëzhin  
vargjet e pathëna  
për ty  
nuk shteruan  
eh  
shteruan mushkërinë

mbi fatin tënd të tjerët  
dhunshëm diktuan kursin e rrugëtimit  
dashuri e shpirtit  
në rrugëtim  
jetë në flakë përcëlluar  
jetë në blozë e tym  
pa ty  
kohë në rinumërim

## Shpërthim

mitin e robërisë shpirtërore vranë  
gjithë ajo peshë padrejtësisht  
bartur përdhunshëm në kohë  
a thua iku  
vrasësi mitik i këngës lirike  
shpërthe  
shpërthe ndjenjash ti  
moj mike

urojmë që koha të shërojë  
plagët e trupit  
më shumë  
plagët e shpirtit



## **Fyelli**

për një tingull dashurie  
plasën mushkëritë  
plagët e zemrës kërkojnë shërim  
melodi e thjeshtë

Kosovë  
fyellin e dashurisë ta grabitën  
nga Mollë e Kuqe  
tek Guri i Shpuem  
ditën të qanë natën të shitën  
tingull i fyellit të grabitur  
fishkëllimë

Kosovë  
dashurinë për ty nuk e tjetërsuam  
nuk e shitem  
me këngën e dashurisë në gji  
me ty e për ty  
jetuam

## Sirenë

fatim joshës kërkohmë  
mbi krahët e këngës  
butësisht shaluar  
këngën për ty kërkua  
sykaltër si deti  
Sirenë  
kot nuk të pagëzuam

mes trëndafilash përkundë  
këngë në grykë mbetë  
djep i ninullave plot  
me dashuri  
e  
jetë



# THYRJET NË PASQYRË

## **Papandehur**

tek lulishtja të takova  
papandehur  
mes hamendjeve s'u pendova  
shtanga  
desha  
por dot  
nuk u largova

mes lulesh  
aromën e një luleje  
mora

## **Kujtime**

mbi sipërfaqen kaltëroshe  
si në pasqyrë  
dukej portreti yt  
kujtime të largëta  
nga dallgët e jetës përmytë

tani  
ikën ato kohë  
kur në bregun e lumit  
portreti yt  
buzëqeshje dhuronte  
kujtime sa një det  
kush nuk të adhuronte  
kujtime  
që përjetësisht  
koha nuk i vret

## **Moshë e tretë**

në rrudhat e jetës humbë e tretë  
të rrudhur e të zënë ngushtë  
para vetes  
s'kemi nga ikim  
janë  
ligjet e jetës

moshë e rrudhur  
moshë e tkurrur  
në kohë  
e me kohë  
dashuri dhuroni  
për botën flakëmadhe  
kujtoni  
mos harroni  
moshën me halle

## Thyerjet

plagë të pashëruar  
thyerje të pashtuara  
peizazhe të lënduara  
nga thyerjet  
që rëndojnë

rëndojnë si guri  
në zemër të malit  
thyerje e zemrës së vashës  
e zemrës së djalit  
nga shkëndijat e para  
të mallit



## **Përjetime**

dashurinë skofiare  
kush e ndien  
më shumë

me të përjetuarit e veçantë  
të bukurës së dheut  
kush i këndon

me gjuhën e vet  
më bukur se poeti  
asaj  
kush i flet

## Muzat

muzat e mesnatës me joshje  
në befasi i zura  
më luten që t'i falja  
jo  
nuk i fala  
në poezi i vura

ndjekja kishte filluar që moti  
vërdallë të vinin mendtë e kokës  
i zuri ai që ishte më i zoti  
në gjirin e tokës  
ku bima kokën kishte nxjerrë  
idil e muzës  
që nuk shterë

## **Fitores**

në rrethim  
shtrënguar  
një rrethim krejt i errët  
që pretendonte ta ndante  
nga të jetuarit e vet

ajo e kuptoi rrethimin  
qeshi  
nuk bëri vaj  
e vrau hilen prapanike  
me buzëqeshje e saj

## **Pa dashje**

pa dashje moj zogëz  
të fyeva  
të lëndova  
i gjalli edhe mund të gabojë  
që moti s'kam fyer askënd  
sonte  
do ngrysem me faj

ndihem i lodhur  
i trazuar  
diçka m'i gërryen mushkëritë  
mbase fyerja që të kam bërë  
ëh  
të mos ishim takuar atë ditë  
pa dashje

## Syzeza

mbi vegje mbeti syzeza  
fatziun duke e qarë  
fijet e pëlhurës u këputën  
në rrugën e shpresës së humbur  
ëndrrash kallë

pëlhurë e bardhë  
dërrasë e vekut  
kthyer në dërrasë varri

Syzeza  
në botën përtej lotit  
të kërkojë fatin e saj  
jeta ka edhe lumturi  
nuk ka vetëm vaj  
pëlhurë e kuqe  
pëlhurë e bardhë

## **EPIKË E PËRFLAKUR**

## Çiltërsi

kambanat po bien  
për një kurorëzim dashurie  
botën e madhe po e zgjojnë  
nga gjumi i rëndë

qyteti po kumbon  
tek altari  
çiltërsisht para dashurisë  
përkulet njerëzia  
dashuri e hedhur në altar  
dëshmitarët duartrokas  
çiltërsi valë  
kambanat zinë  
po vrasin

## Portret

në galerinë e qytetit tim  
atë ditë  
mungonte portreti yt  
kryq e tërthorë i rashë gjithandej  
askush s'të ngjante  
as në portret

fytyrë zbehur ika nga aty  
me frymën e këputur  
në vesh  
zanat butësisht më thanë  
o njeri i mirë  
portreti portretit  
nuk i ngjan



## **Shkëlqimi që vret**

se do të vriste shkëlqimi i vet  
e kisha vënë re  
kaherë

ti  
vesë e bardhë  
yshtur pas hënës së kuqe  
mes yjesh  
u fute në garë  
ndjenja e krenarisë në fluturim  
në qiellin tënd  
mospërfillëse  
të vrau shkëlqimi yt  
e ne  
na plasën sytë

## **Rimat**

të bukurat rima në vargje  
të bukurat nota në harqe  
të bukurat peizazhe në natyrë  
të bukurat zana ndër male  
asgjë s'paska  
të përkryer

rimat  
na pritën e na përcollën  
shi dashurie në jetën tonë  
sollën  
në kopshtin e trëndafilave  
të prushtë  
dashuri mbollën

## **Një tufë me lule**

zhytur në botën e fantazisë  
në dorë po mbante  
bastunin  
një tufë me lule mbështjellë  
dhe peshën e pleqërisë

ndër mote  
këngët e pathëna të dashurisë  
nuk u thanë  
kishin punë të tjera etërit tanë  
lirikat e buta  
luadheve me lule  
i mbollën  
për ne  
i lanë

## **Notat e melodisë**

notat e shkapërderdhura të melodisë  
nuk i gënjeva dot  
lirikat në gjumë nuk i vura  
as sot

në motin e ndërrimit të hënës  
fytyrëmadhe sa një bukë  
foshnja  
në gjirin e nënës strukë  
në gjirin e nënës  
si në gjirin e atdheut  
prej damarëve të gjakut të saj  
buroi jeta  
kënga  
përjetësia  
burojë  
dashuria hyjnore

## **Më shumë dashuri**

mos qani më shumë se ç'duhet  
këndoni më shumë  
mos urreni ligjet e jetës  
dashuroni më shumë

pas shpine  
mos shani të bukuren e dheut  
lirikat flasin më shumë  
këngët të mos i vrasim  
botën e madhe ta thërrasim  
për paqe  
e më shumë dashuri  
pas shpine mos më shaj  
as ti

## **Trazim**

me ndërgjegje të trazuar  
kaq herë kam provuar  
sinqerisht  
mendjen kam vrarë  
netëve të gjata  
neveritë që si mbanë letra  
mendimet m'i kanë ndrydhë  
mbi mundësitë e mia  
nuk dola dot

trazim i bartur nga dje  
me buzëqeshje ironike  
sot  
si dhuratë e ftohtë  
edhe këtë natë  
ikja jote moj mike  
e rëndë  
si ngulje thike



# **LIRIKË SHPIRTËRORE**



## **Goditje**

vështrimi i saj më goditi  
me erë  
puhizë e aromë  
frymëmarrja  
më tradhtoi

u hamenda  
s'u përmbajta  
nga urrejtja apo dashuria  
goditje e fatit të lig  
mbase  
nga të dyja

## Nëpër kohë

si në ëndërr kaluan  
nëpër kohë  
vitet

si një patkua kali  
varur mbi derën e vjetër  
mbetën  
kujtimet

fat i varur në gozhdë  
jetë e mbushur me shpresë  
njerëz  
lini gjurmët nëpër kohë  
se koha ikën  
kujtimet  
tretën

## **Kaltërsi**

kaltërsi e syrit tënd  
si kaltërsi deti  
do të futem në thellësi  
të vërtetën  
për ta gjetur

sy  
kaltër  
sy  
patrembur moj zanë  
bjeri rrotull botës së dashurisë  
bjeri  
anë e mbanë

## **Këmbëngulje**

nuk u bëre kurrë një me qetësinë  
jeta e lidhur me këto male  
madhështi shpirtërore  
që të ngacmon  
për të mësuar  
diçka për të gjallët  
diçka për të vdekurit  
e diçka  
për ata që do linden  
një ditë

me këmbëngulje kërkojë  
kënga  
të mos ndalojë

## **Këngë**

këngë e vaj  
ekuacion me shumë të panjohura  
dashuri falni  
për pëllumbat e qiellit tonë  
në fluturim  
rënë

kënga për ju gjithmonë  
u këndoftë  
kënga për ju  
kurrë  
mos u shoftë

## **Fali**

çapkënët të “shanë” ty  
të “shanë”  
faqepjeshkë të thanë  
ti u skuqe  
buzëkuqe  
moshë e re  
moshë pa mëkate  
moshë me huqe

fali  
të padjallëzuara ka sharjet  
rinia  
fali e lehtësuar të jesh  
mes shoqesh më e bukura  
ti  
faqepjeshkë

## **Portreti në kornizë**

dikur moti  
piktorë të kohës antike  
joshje  
frymëzim  
idil  
sakrificë këmbëngulëse  
bukuri mitike

koha të solli nën sqetull  
Monalizë moj mike  
gënjeshër apo  
realitet  
buzëqeshja jote  
ndryrë në portret

brenda kornizës në shekuj  
histori e pa zbërthyer e artit  
kjo mjeshtrin e penës së vjetër  
varur në maje të gozhdës  
si testamenti  
në letër

## Çmallje

pusi i zura  
shtegut të retrospektivës  
u çmalla në soditje  
o kohë e pa djallëzuar  
ndjenja të papërsëritshme  
ti ike

çmallje me portretin tënd  
zana të shitoftë  
ti  
kohë në ikje



## **Dashurisë i kënduan**

i kënduan  
faraonë  
perandorë  
mbretër e filozofë  
për ty ngritën tempuj  
e nuk të përjetësuan dot

prapë dashurisë do t'i këndojnë  
si dje  
sot e mot  
njerëzit që dashurojnë  
rimën e djalërisë kanë në gji  
muzë me frymëmbushje  
o njerëz të botës humane  
këndoni  
këngën e madhe

## **FALNI LIRIKAT**

## Një mall

më zgjoi çuditërisht një mall  
magjepsur nga shkëlqimi i rremë  
qiellin frikshëm shikova  
ngrohtësinë e trupit të saj  
në shtratin e ëndrrave të mia  
e ndjeva  
jo  
s'e takova

një zhurmë më lehtësoi mendimin  
trajktore replikash  
në dilemë  
për fjollat e shkrira të borës  
në sapofillim të dimrit  
si ëndrrat tretur  
tek streha ime  
nën peshën e mallit të vjetër

## **Lirikë**

dashuri  
herë tragjike  
herë lirike  
kush troket në derën e  
këngëve të mia  
nga plagët e jetës lënë  
në rrugët e saja të gjata  
mendim i pathënë

lirikat e mia  
lagur me ujë  
lagur me djersë  
lagur me verë  
lagur me vesë  
thjeshtësi e fjalës  
kuptimin se humbe kurrë  
dashuro jetën  
rini e vendit tim

## **Ëndërr e vjetër**

një trazim  
në ndërrimin e stinës së vonë  
si nëpër mjegull  
mbi aeroportin e Prishtinës së vjetër  
ateroi  
ëndrra jonë e djegur

baladë e lashtë e lotëve të lëndinës  
prapë lot  
mbi aeroportin e Prishtinës

në shtegun e gjatë  
rrugët e mallit të kurbetçinjve  
as sot  
zanat e malit  
nuk po i lënë rehat  
prapë  
lot

## Rënie

bora ra nga maja e malit  
mbi faqe  
gjurmët e rrokullisjes së lotit të kripur  
mbetën  
si gjurmët  
e plagës së vjetër

loti i rënë nga gjethi i lisit  
si rënia e Sizifit  
e domosdoshme mbase  
borë e bardhë rënë  
si bardhësi plisi  
gjurmë të pashlyera dashurie  
përgjithmonë  
rënë e  
lënë

## **Befasisht**

pak kohë para se ta tradhtonte  
befasisht  
i tha ajo  
të dashuroj  
të vetmen gjë që nuk e priste  
nga jeta  
ishte tradhtia

a thua erdhi ora  
e qetësisë shpirtërore  
një orë para se ta tradhtonte  
ajo  
i tha  
të dashuroj

vallë  
kush s'më thotë  
të jetë kaq i cekët lumi  
mes dashurisë  
e tradhtisë

## **Trokita**

ndrojtur trokita  
në portën e kujtimeve të largëta  
testamentin e mallit të parë  
në kalanë e lashtë  
hipotekë lënë  
për ta marrë

barrë e një kohe tjetër  
padrejtësisht rëndove  
plagët  
e kohës së vjetër  
në dyert e ndërgjegjes trokasim  
të vërtetën për ta gjetur  
ëh  
sa jemi humbur  
sa jemi tretur



## **Ndryshku**

nën kangjellat e hekurt  
pranë dritares  
një zemër ndryrë nën krahatorë  
ndryshku e hëngri  
ndryshk ky  
tinëzisht i vënë nga një dorë

ti kohë e ndryshkur në ikje  
domosdoshmërisht dënuar  
nën kangjellat e dritares moj mike  
po marrin jetë  
trëndafilat  
e kohës së vonuar

**ATJE KU NUK BIE BORA**

## **Vargjet mos m'i prekni**

mos më zhvishni nga gjërat që më rrethojnë  
s'ka gjë  
kush të dojë të më shajë  
kush të më lavdërojë  
unë nuk ndjehem i vrarë

vargjet  
batutat  
veset  
lirikat  
mos m'i prekni  
janë petkat e mia që më ngrohin  
është godina e shpirtit tim  
që më mbron  
nga furtuna e hidhëruar  
netëve të gjata pa gjumë

me peshën e lapsit në dorë  
kam shqyer heshtjen e natës së vonë  
figurave jetë për t'ju dhënë  
lini ato të marrin udhë  
se malli me dogj për udhët  
e atdheut tim  
lini

## **Harrimi**

dera e vjetër prej druri  
nuk po troket më  
zilja e telefoni nuk cingëron  
letra ka kohë që s'kam marrë  
as në E-mail

përmallshëm një pështjellim  
pikëtakimin diku  
në fushat e atlasit tim  
ku meridianët kryqëzohen  
një numër mungon  
mungon  
ti

ti  
që zgjoheshe para agimit  
peng i kohës mbetur  
në gojën e harrimit

## **Pa pritur**

erdhe në galerinë time  
pa pritur  
para veprave pamore  
në gjunjë rënë  
në shumëkuptimësinë e tyre  
butësisht  
diçka kërkove

portretet u asfiksuan papritur  
pikturave memece  
zjarmia u ra mbi ballë  
nga valë e dashurisë  
së mallit të parë  
lotët rrodhen mallëngjyeshëm  
mbi faqe  
të portretit të saj  
shtangur vizitorët  
portreti po qanë

## **Gjallë**

në gjirin e llogarive të vonuara  
mos humbisni kohë  
bëhuni të gjallë  
ngrohtësi  
këngës për t'i dhënë

pa dyshim  
ngrohtësinë e gjirit tënd  
ngrohtësinë që na dhurove ti  
nënë

## Hiri

thëngjijtë e fjetur nën hirin me ngjyrë  
i trazoje ti ngadalë  
si flokun tënd dikur në pasqyrë  
me ndjenjën e dashurisë së vaktë  
trazim i rindezur thëngjijs

ngjyrë e prushtë me hi mbuluar  
nga ai zjarr i madh  
në oxhakun e vjetër dikur  
nën hi  
mbeti nënshtruar  
zjarr i dashurisë së djegur  
nën hirin e fjetur

ti varg i pashkruar  
i një kohe tjetër  
peng mbetur

## **E pa thënë**

kush guxon të trazojë  
lumin e mendimeve të mia  
nga orët e liga nuk mora gjë  
nga buzëqeshja jote  
sinqerisht  
plagët miklova

nga urrejtja për atë kohë  
deri tek dashuria  
e fshehur për ty  
sot  
ka diçka çudibërëse  
që e mbaj peng në gjë  
e pa thënë në kohë mbet  
kënga e dashurisë  
për ty  
tretë



## Sonte

sonte më duhet dikush  
sonte më mungon dikush  
sonte më bezdis dikush  
sonte më frymëzon dikush

sonte  
si në përrallë më vjen malli  
për kohën e largët  
që u mbyt përfundimisht  
në detin tonë të kaltër

sonte  
valët e detit janë trazuar  
nga pamundësia e kthimit  
mbi retë e bardha shaluar  
në fundin e stinës së dimrit  
me huqe lazduar

sonte  
unë dhe deti po gjëmojmë  
valët në kacafytje  
në shenjë xhelozie  
sonte  
namin po bëjnë

## **Këtë natë**

kalorës  
mbi shpinë i kam hipur kësaj nate  
deri me të zbardhur do ta shaloj  
mbase do ta arrij cakun  
kohën e largët ta afroj

unë kalorësi yt  
unë jam  
sa herë kam fluturuar  
mbi re të bardha e të zeza  
unë jam fajtori  
nëse sonte  
të zë lemza

nga joshjet e kohës së lazduar  
edhe këtë natë mos më shaj  
retrospektivë e vrarë pa fajin tonë  
nga kujtimet e fundit  
të asaj nate  
nate  
të vonë

sonte me buzët varë  
do ta lë në rrugë  
vargun kujdestar  
duke të kërkuar mes yjesh  
mes yjesh me zjarr

ti shelgu pranë portës  
me gjethet varë

## **Përplot një jetë**

pse për ty  
kënga ime pashpjegueshëm vonoi  
kaq rëndë kush e vrau  
këngën tonë

ëndrrat tona rinore  
kaq pamëshirshëm  
kush i lëndoi  
tani  
gjoksi dhe kënga në shpërthim  
nxorën vrerin e kohës së vvarë  
si shtëllungën me tym  
mbase nuk të vjen keq të të them  
edhe pse kaq vonë  
e dua qiellin  
ku ti fluturon



## **AUTORË TË SAKRIFIKUAR**

## **Me thinja**

kohë në ndrydhje  
thinjat rënë si bora mbi mal  
bukurinë e dikurshme  
nuk ta fshehin  
nuk ta vrasin  
as malit  
as ty

me instinktin e mbrojtjes  
barrikadë mes vargjesh kam vënë  
si në istikame  
nga martirizimi i pleqërisë  
ti kohë në ikje  
që butësisht kalon  
thinja që diçka flasin  
që më shumë thonë  
ti kohë e thinjur  
e stinës së vonë  
lojë e dikurshme  
ndalur  
në një stacion

## **Kot u mundova**

konstatimi se disa gjëra  
nuk mund t'i ndjesh  
nuk mund t'i ndalesh  
nuk mund t'i kuptosh  
nuk mund t'i përshkruash  
ndryshe  
veç siç janë  
fatmirësisht  
më doli i saktë

dashuri intriguesit  
nuk duhet t'i falesh



## Pyetje

Gjeneral nuk kishim parë  
ushtarë të sprovuar  
në fushën e përgjakur të dashurisë  
po

ushtarë pa Gjeneral  
pyetje në kohën e gabuar  
që romantikën prishin  
ushtarë rënë në pusi të dashurisë  
me këmishën e grisur lidhnin  
plagët e saj

në përpjekje për të shëruar  
shpirtin e butë  
në butësinë e shikimit  
humbur e trazuar  
flakën e dashurisë  
ndezur  
kishin harruar

## **Të kërkova**

me një tabor hijesh të shpartalluara  
të kërkova  
ti gjurmëhumbura e zanuar  
nuk erdhe as sot

s'kisha shumë për të të thënë  
veç se dy fjalë  
ti Zanë e zanuar  
më thuaj

atë ditë kur admirimi të kalon në urrejtje  
më thuaj  
nëse intrigat kanë zënë vendin e bujarisë  
më thuaj  
mos të gënjehemi mes vete  
më thuaj me kohë  
pas kohe  
jo

## **Porta e dashurisë**

kokën kishte mbështetur  
në gjoksin e fatit  
në dremitje të dy  
fati dhe ajo

të humbur që moti në soditje  
rrugëve të ndjenjave lajthitur  
me shpresa zhgënjimi nën sqetull  
në kërkim të një strehe tjetër  
trokit fuqishëm  
tek portën e dashurisë së vjetër  
në tentim për të kthyer  
motet e mira  
për të kthyer  
kujtimet e dëlira  
ti  
ishe më e mira

## **Rexha i nënës**

*(O mor gjok t'u këputeshin jelat...)*

mes shqelmave të legjendës  
dhe mistifikimit ndër shekuj  
kënga për dhembjen  
mbi fatin tragjik  
u mitizua

mes tragjedisë së mitizuar  
dhe ndjenjës për të  
një këngë elegjie  
mori udhë nëpër shekuj  
shtigjeve të jetës ngatërruar  
dhe prapë u këndua  
dhimbja nuk pushoi  
për trimin  
dhe nusen  
e pafat

më barrën e dhembjes  
të vdekjeve tragjike mbi shpinë  
populli im  
kaluar shalove nëpër kohë  
e koha nuk të zhveshi nga mitizimi  
i vuajtjes

zgjohu Rexha i nënës  
e dil

të shtegu i lamës  
se dasmorët po vijnë  
po të sjellin nusen  
dasmorët që rrugëtuan njëqind vjet  
po të sjellin nusen  
dhe melodinë

## Univers

(F.Grajqevcit)

përditë po i zvogëlojmë borxhet  
përball jetës sonë të varfër  
shprehimisht  
vitet që na takojnë po zvogëlohen  
numra në rënie  
shtrëngatat ziliqare na kanë rrethuar

arkeologu pranë ashtit fosil  
gojëhapur e hutuar mbeti  
retë ngarkuar plot me shi  
ulur por si kësulë e bardhë  
mbi majat e larta të Golashit  
atje ku flamuri i ëndrrave tuaja  
zhurmshëm po valon

me zvogëlimin e viteve  
dhe borxhit ndaj jetës  
pengu i borxhit një ditë  
mbetur fashitur brenda vetes  
të porta me rrapëllima do na trokasë  
për të marrë hakun e së vërtetës  
do t'na thërras  
kush (s)më thotë  
e kemi zvogëluar borxhin  
për vëllain e motrës  
për birin e tokës

për Fazliun e nënëlokes  
që dashuri i fali atdheut  
i fali jetës  
i fali tokës

## **Pa emër**

zjarr i prushtë dhe hekur i farkuar  
nuk iu ndanë tërë jetën  
me dorë rrahu hekurin e skuqur  
me hekur davariti  
hallet e jetës  
shprushur

e habitshme  
botë me hile  
si nuk i ngritën dashurisë një shtatore  
ku do të gjunjëzoheshin  
në shenjë pendimi  
vrasësit e saj



## Më lini

mos më qorto  
pse këngët i kam të tilla  
pse futem skutave e shpellave atje thellë  
ku deti të fundos e vala nuk të nxjerr  
ku shtrihet terri e mëria  
ku fshihet përçmimi dhe ironia  
mos më pyesni  
pse gërmoj atje

dua të futem atje thellë  
ku në pasqyrën e liqenit shikohen zanat  
dua t'i prishi kurthet  
ku rrjetin ngrehin merimangat  
dua t'i futem atdheut në kërthizë  
atje  
ku fshihen thellë  
këngët e dashurisë

## **HIJET E SHPIRTIT**

## Nënë

kush më ëmbël fjalën thotë  
bukën e ngrohtë kush na e bënë  
kush na përkëdhel me dorën e vet  
me zemrën valë  
kush na uron rrugën e mbarë  
kush rron me kujtimin për ne  
nënë  
sa shpirtmadhe je

## **Për nënën**

në kujtim të pritjeve të saja të gjata  
kur kthehesha  
nga rruga  
nga shkolla  
nga burgu  
nga mërgimi ...

tani kush do të më presë  
ajo nuk është më  
nënë  
veç atë dhe tokën shqiptare  
kam thirrur

nënë  
simbol i pjellorisë  
nën  
rrënja e Shqipërisë

## **Të urtës nënë**

lëvizte kujdesshëm me hapat e lehtë  
në oborrin e lulëzuar të shtëpisë  
dorën vënë mbi ballë  
e në soditje  
me aritmi zemre  
në pritje  
të kthimit të bijve të saj

atje fshehur  
përtej avllisë  
po fshinte lotin e saj  
me cepin e vjetër të shamisë  
nën strehën e pritjes  
me zemër të djegur  
pritje

ëh  
ato pritje të gjata  
në rrugëtim na zu nata  
të dy palët  
pa gjumë  
ne  
dhe nënat që i duam shumë  
të urtat nëna  
për ju  
s'do shterojë kënga

## Një jetë

*(bashkëshortes time)*

dorë e saj shtrirë lehtë  
mbi rrudhat e ballit tim

dinjitetshëm  
katrahurat e kohës përballoi  
bartur padrejtësisht mbi shpinë  
vuajtjet  
dyfish i përjetoi  
si grua dhe si nënë  
me atë në krah ndihem nderuar  
që barti mbi supe  
barrët e jetës së rëndë

në kraharorin tim  
nga zjarrmia kallë  
jetë me peripeci  
jetë valë  
jetë si në ëndërr  
jetë zhgjëndërr  
jetë si në përrallë  
jetë dhimbjesh e plot mall

edhe një jetë sikur ta kisha  
e kush jetën nuk do ta dëshironte  
dorë e saj mbi ballin tim  
kurrë  
nuk do të më lëndonte

## **Gjithmonë**

gjithmonë do të kthehem tek ti  
edhe pas vdekjes  
toka brenda nuk do më lërë të qetë  
nuk e di  
nëse unë ju mungoj  
aq sa më mungoni ju mua  
nuk e di  
nëse më doni  
aq sa unë ju dua  
nuk e di

peizazhe të atdheut  
më çoni shpirtin peshë  
më trazoni kaq shumë  
unë shpirttrazuar  
si hije  
fundosur në humbëtitrat e kohës  
as zgjuar  
as në gjumë

## Kohë

na duhet kohë  
për të sjellë në kala  
nga fundi i botës Doruntinën  
vëllai ngritur nga varri  
erë dheu po vinte  
po vinte erë bari  
prej kohësh  
vëlla e motër  
degdisur e djegur malli

në kërkim të pafajësisë  
u ngritëm edhe nga fundi i dheut  
besën e dhënë  
peng nuk e lamë  
dashurinë për motrat e sollëm  
në gjirin e këngës së lashtë  
si në ëndërr  
erdhëm edhe nga bota tjetër  
fluturim me atin e bardhë  
përballë motrës  
fjalën e dhënë  
peng nuk e lamë



## **Hyrje në pranverë**

*(kushtuar demonstratave të viti '81)*

pranë dritares sy hapur  
nga maja e pemës  
u ngritën zogjtë në fluturim  
me krihet e butë  
borën shkunden  
pranvera po vjen  
ma në fund  
edhe në qytetin tim

po  
po vjen marsi i trëndafilave  
afshi i ngrohtë tokën puthiti  
një lirikë  
për bisqet e pemës  
po ndihet frymëmarrja e blerimit  
ngrohtësi e stinës ripërtëritëse  
stinë e lulëkuqeve  
të marsit të parë

Prishtinë kujto me dashuri  
kujto  
stinën e trëndafilave të kuq lirie  
Prishtinë ata ishin të rinj  
si trëndafilat  
që ranë në pranverën e vitit '81

## Mure

në kërkim të një ndarjeje të përjetshme  
mure të larta kishte ngritur  
dikush  
me gurët e lashtësisë  
në qepallat e vashës  
pamëshirshëm kishin goditur  
këngën e parë të dashurisë  
për ta vrarë atë  
sot e dje  
pa llogaridhënie  
në kohë

enigmë e pazbërthyer  
mbështjellë me vellon e verdhë  
muret e ndarjes  
ngulur kaq thellë  
në zemrat rinore  
mos  
urrejtje mos mbjell

## **Dashuri**

njerëzinë dashuronte  
lum e kua harronte  
pranë burimit  
zemër trazuar ngrihej si n' jermi  
etje kishte  
kishte uri  
për botën e dashurisë njerëzore  
pas muzave prehur  
pas huqave dehur  
vetën kishte lënë pas dore  
nuk dinte për urrejtje  
ai dinte  
vetëm për dashuri

## **Porta ime e lashtë**

ëh ...

shumë herë jemi ndarë  
e vetëm të kam lënë  
vetëm fillikat  
në rrugët e fatit e të fatkeqësisë  
në rrugën e gjatë

si thika në zemër  
me shpirtin nën dhëmbë  
fat i lidhur me zinxhirë  
me mendjen tek ty  
e kam pasur rëndë  
e kam pasur vështirë

po kthehem ngadalë  
tani  
nga anët e botës rrugëhumbur  
tek porta e atdheut  
i heshtur  
do trokas i ndruajtur  
në dyert e nisjes  
nga ditët e largëta të braktisjes

po kthehem  
unë  
biri yt i tretur  
flokëbardhë e i mplakur

po kthehem tek pragu yt  
me lëmshin e mbledhur në grykë

## **ZANORET E BARDHA**

## **Përzierje**

sonte do iki në kahun tjetër  
nga andej  
ku shkon njerëzia  
me ndjenjat e përziara  
do marrë rrugë

kisha menduar të largohem që moti  
nga pikënisja ime e parë  
me mesazhin e vonuar të pritjes  
po bëhem i gjallë  
mes ndjenjash të përziara  
për ta gjetur të vërtetën  
mbi dashurinë dhe urrejtjen  
kufi të ligj  
që vetes i vumë  
net të tëra mbetur  
pa gjumë

## Çuditërisht

me dashje do thosha diçka  
sikur ta gjej atë  
që të tjerët nuk e kanë thënë

çuditërisht  
nuk kishte mbetur as edhe një pëllëmbë vend  
rrugën kishin zënë thashethemexhinjtë  
mbi atë që nuk shkruhet  
e që nuk thuhet

çuditërisht më kishte shtënë forca  
e muzës së parë  
që u përmbyll me një zanore dashurie  
prapë  
të njëjtit njerëz  
gjëra të njëjta po thonë  
për një botë të tërë keq po flasin

çuditërisht  
vetëm ti  
ke diçka që të tjerëve u mungon  
qartësia e gjuhës me të cilën flet  
guximi për t'u thënë gjërave  
në emër të vet



## **Kthehu**

kthehu  
të të përqafoj së bashku me lumturinë  
kthehu  
veç edhe një herë  
kthehu

në arkën ku kujtimi ndryrë mbeti  
ku dikur u mbyll ajo derë  
pengu i dashurisë u vyshk  
si gjethe e verdhë  
rrahur nga erërat  
në heshtje degdisur  
kthehu

jeta të mori nën sqetull  
pluhurin e kohës davariti  
kthehu tek pragu i këngës së vjetër  
tek ajo strehë  
ku së pari hodhe lirshëm  
këmbën e vockël mbi dhe  
kthehu

## Shtegtim

kokën kam vënë në prehrin e lashtësisë  
udhëtoj pafundësisht në oazën shqiptare  
ku prek trëndafilin me vesë  
me gishtërinjtë që dridhja i tradhton  
lot e vesë u bënë bashkë  
dhimbja që më shpon thellë  
thellë  
deri në asht

lojërat e fëmijërisë shqip gumëzhijnë  
në kujtimet e mia  
eh ç'mu këput diçka e krisi  
në gjoksi tim  
diçka si degë lisi  
që bie me dhimbje e rrapëllimë  
e rëndon si guri  
mbi varrin tim ku dheu  
dheu  
vend nuk zuri

plagë e përjetshme në kraharor  
mbeti  
mbeti mbi gjoks një dorë  
një dorë e ngrohtë kujtimesh  
në rrugët e pafundme shtegtimesh

## Sprovë

mes sprovash të vështira  
rrugët e jetës na kalisin  
mesazhin e dashurisë përhapni gjithandej  
maje kokës mbani të bardhë plisin  
mos u joshni pas fijeve të lakmisë  
mos e ligështoni fisin  
arbëror

ai  
me dorën e vet burrërore  
mbolli fidanin e parë  
në kopshtin e dashurisë  
në vatrën e prushtë shqiptare

atdhe  
me besën e dhënë për ty  
për besën u dogjëm  
fjalët mbrapsht s'i hoqëm  
deri në amshim  
për ty dhurojmë dashuri

## **Nuk erdha**

unë nuk erdha tek ty  
me dashje  
pritjen ta bëra copa- copa

ti do mendoje mbase  
ja  
erdhi ky për të kërkuar diçka  
jo  
parimisht  
në jetë  
kurrë nuk kam kërkuar gjë  
unin tim në lojë s'e kam vënë  
as para teje  
as para motit  
as para zotit  
nënshtuar para fatit nuk jam  
nuk erdha  
e nuk do të vij  
me dashje  
pritjen do ta vë në çmendi

## Të gjallë

pas kaq vitesh papritur  
ti  
sërish shfaqesh në ëndrrat e kopshtit tim

ëh  
të gjallë e të patretur  
dhembjet e fashitura m'i ngacmove  
të humbur e të pagjetur  
strehëve të këngëve të harrimit  
nën çatinë e shpirtit tim  
të pata fshehur diku  
koha kishte ngrënë kujtimet  
si ndryshku  
rimat e këngës sonë të kahershme  
që moti nuk janë trazuar  
këngët  
që koha s'i vyshku

a thua do të ketë nota që artikulojnë melodinë  
në gojën e pranverës së parë  
kur ti ike  
këngën e lë vetëm  
e nuk u bëre më e gjallë  
si kujtim  
lulet mbi tryezë mbeten  
me shijen e aromës së parë  
ëh  
të gjallë

## **LIRIKAT E FJETURA**

## **Si trëndafili**

si për habi  
edhe këtë ditë  
prapë  
ajo u zgjua kaq herët  
mes nesh ajo vetë  
më e bukur se trëndafili  
që jeton  
vetëm një mëngjes

në kopshtin e dashurisë  
ti lulja me vesë  
petalet për dhe kishin rënë  
luteni  
mos i shkelni  
mos i shkelni ato më këmbë

## **Përjetësi**

vështrimin përtej detit kishte hedhur  
rrugë e shkretë në mes këputur  
rrugë  
përgjysmë mbetur

ajo po priste trimin  
atje  
ku pinte ujë burimi  
rrugë  
ngatërruar mes ëndrrash të vrara  
sa s'plasi prej trishtimi  
në prehrin e legjendave  
trimi i saj kishte fjetur  
sykaltër si deti  
sy kaltër si lumi  
në gjirin e këngës përjetësisht  
trimin e saj  
e kishte zënë gjumi



## Çaste

me gjithë shpirt  
do të lutem për ty  
mbi gjurmët e lashtësisë  
një shenjë  
mos të lëndohet askush

atje ku i kishim caktuar  
shtratin gurit  
atje ku fle i qetë shpirti im  
për pak çaste  
në këmbë qëndrova  
si perëndinë  
gurët e atdheut  
zanat e vendit tim  
shpirtërisht adhurova

## **Përtej pritjes**

sonte nuk do të flas më shumë  
sonte do të pres në shkujdesje  
sonte do rri pa gjumë  
deri sa të zbardhë  
e lumja ditë

në pritje të ngadhënjimit tënd  
vendi s'po më mban  
nuk do bëj gjumë  
as net të tjera  
deri sa ti nuk i buzëqesh jetës  
deri sa edhe për ty  
nuk do të del pranvera  
pritje  
përtej pritjes  
ti hënë e natës  
e diell i ditës

## **Përditë**

përditë e ngapak po zvogëlohen  
hapësirat e kohës së butë  
ashpërsi e mortit  
matemi me hijet  
mbi lëndinën e lotëve  
burrëri e hequr në kandar  
mes kockash shkapërderdhë  
lulet që u thanë nga loti  
për një pikë ujë  
mbi plojën e verdhë  
vetëm ti  
jetë dhe dashuri sjellë

një ditë  
do rinohen ato  
atë ditë kur tek kjo derë  
do bëhet i zoti  
do thahet loti  
ndër mote derdhë

## **Malli**

bashkudhëtojmë rrugëve të qytetit tonë  
kalldrëme që i kemi shkelur dikur  
së bashku me këmbë  
si në ëndërr i pashë  
i pashë  
mbrëmë

këngë e vjetër  
që nxjerr vrerin e heshtjes  
mbi melodinë e fatit të djegur  
po  
si në ëndërr  
ti fluturon mbi re të bardha  
e njerëzishme hijelehtë  
butësi shpirtërore mes yjesh  
kohë e butë në davaritje  
që mallin nuk e tret  
ti drenusha e malit  
ti  
e bukura e dheut

## Orë e vonë

hyre në portën e shpirtit tim  
e ndrojtur  
në këto orë të vona

ti  
hije e pambrojtur faqe murit  
në pafajësinë tënde degdisur  
kush të goditi kaq padrejtësisht  
këtë damkë kaq të zezë  
kush ia dha  
ëndrrës sate të brishtë

ti  
gërvisht të kaluarën tonë  
me shpresa të këputura në mes  
me ritmin e orës së vonë  
ku akrepi ndaloj  
me kujtimin e saj tretur  
mbeti ndalë përherë  
akrepi i orës së vjetër

ti  
pranë dritares së vogël  
ku qiriri flakët lëkund në përpëlitje  
butësisht trazojmë ëndrrat tona  
të kohës së largët  
që gjumin prishin

të kohës në kusuritje  
ne dhe koha  
të dy  
në pritje

## **Nuk dua**

nuk dua  
që vargu im  
në vete të bartë  
peshën e shqetësimit

nuk dua të shprush  
në ëndrrat e bukura të jetës sate  
sylarushë

ylli yt vezullues të ndriçojë përherë  
të rrugëtojë lirshëm hapësirave kaltëroshe  
të shkëlqejë më shumë  
ngase dëshiron

ti  
më e bukura mes shoqesh  
nga do që shkon  
vetëm ti  
para yllit të mëngjesit  
me flokun e shkapërderdhur mbi gjoks  
agon

## Një ditë

një ditë shtatori të takova  
atë ditë  
ëhë  
atë ditë

kujtimet fiksuan peizazhin e vonë  
një ditë dhe një herë  
në shtator dashurova  
dhe një ditë tjetër  
shumë më vonë  
u ndeshëm prapë  
nën strehën e vjetër të këngës sonë  
u ndeshëm më kot  
dhembshurisht  
ishte tepër vonë



## **Lozonjare**

vardisur pas këngës si sorkadhe  
të bukurat lozonjare  
në valle  
ngjeshur në radhë  
aritmi  
në gjoksin e saj  
me zemër të kuqe  
ai po bëhej dhëndër  
ajo nuse

lozonjare gushëkuqe  
vallëzo  
mos ndalo  
rrugë të gjata ka jeta  
jeta  
ka rrugët e veta

## **Lulëbardha**

as atëherë  
ti nuk mbaje gërsheta  
me flokun e zi mbi supe  
mes qindra lulesh të gjeta  
me ëndrrat e bukura na lidhi jeta

dhe ëndrrat i zuri mynxyra  
enigmë e fatit pa zbërthyer mbeti  
ndjesi e butë  
e çiltër ishte rinia  
as atëherë  
ti nuk mbaje gërsheta  
ku do varej dashuria

bengu i kohës që gërvisht  
në kujtimet tona  
kohë e vrazhdë  
kohë që nuk ishte  
nuk ishte  
e jona

## **Dëshirë**

nuk u duk  
madje as sa për të dhënë kumtin  
kokën kishte mbështetur në gjoksin e fatkeqësisë  
për një kohë që ishte fishkur  
për një kohë që nuk shpaguhej  
për një kohë që nuk rikthehej

me atë pamje të veçantë  
përzgjedhur sipas shijes së saj  
dëshironte të mbetej e vetme  
e vetme  
si pranvera  
pranverën për ta sfiduar

## **Si hëna**

me dukjen e saj në horizontin e kuqërremtë  
deri dje të kishim sharë  
se na i mashtrove djemtë

si hënë e kuqe  
moj nuse  
përflakur në qetësinë e natës  
pamje magjike  
këto gjetje të rralla  
si hëna  
na erdhi nusja moj mike  
imagjinatën e krijuesit  
mori me vete  
diku larg e davariti  
diku larg e treti  
kur hëna nga malet zbriti

## **Këngë skofiare**

e buta kënga ime  
me kë do flas unë këtë mesnatë  
në konakun e zemrës sime  
unë dhe ti  
flasim me belhollën  
me syzezën  
me bjeshkën  
me mollën  
me lisat e gjatë  
me kaltërsinë e lumit  
së bashku  
thyejmë heshtjen këtë natë

kënga ime  
këngë e vjetër  
këtë natë veç teje  
nuk gjeta  
prehje tjetër

## **Sorkadhes**

të panumërt janë ata që të kënduan  
kënga për ty kurrë nuk pushoi  
syëmbël  
sybutë  
sinonim i urtësisë  
pritë të vunë të rinjtë  
verbuar nga bukuria jote  
iu plasën mushkëritë

ti  
e ndruajtur si gjithherë  
nuk re në pusi të dashurisë  
sorkadhe  
kush vrau butësinë tënde  
e vraftë dorë e motit  
guri ballërrudhur shpuar  
shpuar  
nga kripa e loti



**KUMBIM KĚMBANASH**



## Ecje

me vështrimin e tretur larg  
meditim në ecje  
në rrugën e madhe të kësaj bote  
me hapin tim të vendosur  
shkeli me kujdes  
mbi buzët e çara të tokës së plasaritur  
dhembjet nuk dua t'ia rëndo

ecje përpara  
mbi buzët e çara  
mbi buzët e vashës  
mbi buzët e nuses  
plasaritur  
për një pikë dashurie  
njerëzore  
tokë e etur për një pikë uji  
atje thellë  
ku ka zënë fill fara  
e dashurisë

me gjithë krenarinë e ecjeve  
në rrugët vjeshtake  
nën prizmin e syzeve të mbylltë  
më i moshuar se dje  
më i ri se sot  
me ngrohtësi ylli  
toka  
nuk u ngop

## **Moshë dhe vite**

ngarkuar mbi kurrizin tonë  
vitet  
përditë po rritën  
po shtohen  
në kujtesën tonë mbetën  
bëmat që ikën  
bëmat që kalëruam  
kujtime prush  
vite që nuk mund të peshohen  
me halle mbushë

ishim të rinj  
dhe  
si të rinj që ishim  
ëndrrash e ndjesish grisur  
grisje me pahir  
a do na falësh mëkatet  
ti  
o kohë e dëlirë

kohë që na iku si ndër duar  
o zot  
sa jemi penduar  
përballje e plasur në sfondin e verdhë  
tek lirikat e shumëkërkuar  
lini hapur  
mos e mbyllni atë derë

të kohës së bukur  
rinore  
që nuk rikthehet më  
asnjëherë

## **Të kërkoj**

duart më ranë copë duke gërmuar  
në mos  
në gjirin e tokës do të gjej ty  
e ti  
mbi dhe qenke  
hyjni  
kush s'të këndoi ty

në udhëkryqet e ngatërruara të jetës  
mos humbni shpresat  
narracion në ikonizim  
hyjni kulti mbi dashurinë  
ngritën njerëzia  
ngritën  
perëndinë e diellit  
qiellin për ta mbarësuar  
frymëmarrjen tokës  
për t'ia shtuar

## **Të gjithë**

në këtë jetë  
të gjithë jemi sprovuar nga pak  
djegur jemi  
gëzuar  
fyer e prekur  
zhgënjyer e ngazëllyer  
si valët e detit në përplasje  
me buzë në vaj  
një pikë loti  
në cepin e syve të saj

dhe  
prapë do të ecim bashkë  
krah njëri- tjetrit  
mbështetur fuqishëm  
mbi të vërtetën  
pika shiu në reshje  
lotin ta kthejmë  
në buzëqeshje

## **Kërkojë falje**

kërkojë falje  
bukën time të ngrohtë pranë oxhakut  
dua ta ha rehat  
nën çatinë e shtëpisë sime të lashtë  
do pushoj i qetë

rrethuar me ëndrra të padjallëzuara  
kërkojë falje  
as kur jam zgjuar derën nuk ua hap  
makthi i ligësive  
ëndrrat m'i vret  
dua të lirohem vet  
dua të lirohem përfundimisht  
nga njerëzit e ligj

singerisht kërkoj falje  
nga ju o njerëz të mirë  
nga ju o shokë  
nga ju miq

**Zvicër, 2013**



## Shënime për autorin

Mehmet Bislimi u lind më 24 mars 1958 në fshatin Prekaz të Epërm të Skenderajt. Shkollën fillore e mbaroi në vendlindje, kurse gjimnazin në Skenderaj. Në Universitetin e Prishtinës studioi shkencat natyrore. Në vitin 1981, për shkak të veprimtarisë atdhetare, arrestohet dhe dënohet me burg. Pas daljes nga burgu, më 1986, veprimtarinë kombëtare e vazhdoi në gjirin e LPK-së, ku pati detyra me përgjegjësi. Në vitin 1994, i përndjekur nga regjimi serb u strehua në Zvicër.

- Gjatë luftës së Ushtrisë Çlirimtare të Kosovës ka bartur detyra me përgjegjësi.

Me krijimtari letrare ka filluar të merret që heret. Shkrimet e para i ka botuar në gazetën "Bota e re", Prishtinë, 1986. Më vonë në revistën "Alternativa", në Lubjanë, si dhe në disa numra të gazetës "Rilindja", që atë kohë botohej në Zvicër.

Për disa vite ka shkruar në organin e LPK-së "Zëri i Kosovës" që botohej në Zvicër dhe për të përkohshmen "Rruga jonë"- që dilte në Francë. Në të dy gazetatat, për një kohë të gjatë, është paraqitur edhe me këndin e humorit me nofkat "Ngucakeqi" dhe "Gjemb". Kohë pas kohe shkrimet e tij kanë gjetur vend edhe në gazetën "Epoka e re", "Lajm", "Kosova sot", "Shekulli"



etj., si dhe shkrime të shumta publicistike në dhjetëra faqe elektronike. Krijimtaria e tij letrare përfshin shkrime publicistike, anekdota, humor, poezi, prozë, satirë si dhe mendime të urta popullore etj. Autori Bislimi është anëtar i Lidhjes së Shkrimtarëve të Kosovës, anëtar i krijuesve Shqiptarë në Zvicër dhe anëtar i Shoqatës së të persekutuarëve politik të Kosovës.

**Deri më tani ka botuar këto libra:**

- 1. "Anekdota popullore dhe satira autoriale I", Prishtinë 2002**
- 2. "Trëndafila maji" – poezi, Prishtinë 2002**
- 3. "Fjalë dhe gurë" – poezi, Prishtinë 2003**
- 4. "Këtu i thonë Drenicë - Tahir Meha – monografi", Prishtinë 2004**
- 5. "Ironi e verdhë" - poezi, Prishtinë 2005**
- 6. "Stinë e vonuar" - poezi, Prishtinë 2008**
- 7. "Shkrime publicistike", Prishtinë 2009**
- 8. "Anekdota popullore dhe satira autoriale II" - Prishtinë 2010**
- 9. "Mehmet Delia - alias Mehmeti i Vogël"- monografi, Prishtinë 2011**
- 10. "Shpirtndrituri"- poezi, Prishtinë 2012**
- 11. "Burrëri e lagur" – poezi satirike, Prishtinë 2012**
- 12. "Lirikat e fjetura" – poezi, Prishtinë 2013, është libri i tij i radhës.**

## **PËRMBAJTJA**

<b>LIRIKAT E FJETURA.....</b>	<b>2</b>
<b>FJALA E REDAKTORIT.....</b>	<b>7</b>
<b>NDJENJË E VAKËT .....</b>	<b>13</b>
ASAJ .....	14
ATË .....	15
NJË ËNDËRR .....	16
FOTOGRAFIA .....	17
KA VITE .....	18
PIKËLLIM .....	19
PRITJE.....	20
TA SHPËTOJMË DASHURINË .....	21
VITE .....	22
<b>AROMË FTOI .....</b>	<b>23</b>
MUNGOJNË .....	24
PLAGËT.....	25
SMIRËZI .....	26
BRENGË E VJETËR .....	27
DEHJE .....	28
ZGJOHU .....	29
PËR TY .....	30
SHPËRTHIM .....	31
FYELLI .....	32
SIRENË.....	33
<b>THYRJET NË PASQYRË .....</b>	<b>35</b>
PAPANDEHUR .....	36
KUJTIME .....	37

MOSHË E TRETË.....	38
THYERJET .....	39
PËRJETIME .....	40
MUZAT .....	41
FITORES .....	42
PA DASHJE .....	43
SYZEZA.....	44
<b>EPIKË E PËRFLAKUR .....</b>	<b>45</b>
ÇILTËRSI.....	46
PORTRET.....	47
SHKËLQIMI QË VRET .....	48
RIMAT .....	49
NJË TUFË ME LULE.....	50
NOTAT E MELODISË .....	51
MË SHUMË DASHURI.....	52
TRAZIM.....	53
<b>LIRIKË SHPIRTËRORE.....</b>	<b>55</b>
GODITJE.....	56
NËPËR KOHË .....	57
KALTËRSI .....	58
KËMBËNGULJE .....	59
KËNGË.....	60
FALI .....	61
PORTRETI NË KORNIZË .....	62
ÇMALLJE .....	63
DASHURISË I KËNDUAN.....	64
<b>FALNI LIRIKAT .....</b>	<b>65</b>
NJË MALL.....	66
LIRIKË .....	67
ËNDËRR E VJETËR.....	68
RËNIE .....	69
BEFASISHT .....	70
TROKITA.....	71

NDRYSHKU .....	72
<b>ATJE KU NUK BIE BORA .....</b>	<b>73</b>
VARGJET MOS M'I PREKNI .....	74
HARRIMI .....	75
PA PRITUR .....	76
GJALLË .....	77
HIRI .....	78
E PA THËNË .....	79
SONTE .....	80
KËTË NATË .....	81
PËRLOT NJË JETË .....	83
<b>AUTORË TË SAKRIFIKUAR .....</b>	<b>85</b>
ME THINJA .....	86
KOT U MUNDOVA .....	87
PYETJE .....	88
TË KËRKOVA .....	89
PORTA E DASHURISË .....	90
REXHA I NËNËS .....	91
UNIVERS .....	93
PA EMËR .....	95
MË LINI .....	96
<b>HIJET E SHPIRTIT .....</b>	<b>97</b>
NËNË .....	98
PËR NËNËN .....	99
TË URTËS NËNË .....	100
NJË JETË .....	101
GJITHMONË .....	102
KOHË .....	103
HYRJE NË PRANVERË .....	104
MURE .....	105
DASHURI .....	106
PORTA IME E LASHTË .....	107
<b>ZANORET E BARDHA .....</b>	<b>109</b>

PËRZIERJE .....	110
ÇUDITËRISHT .....	111
KTHEHU .....	112
SHTEGTIM .....	113
SPROVË .....	114
NUK ERDHA .....	115
TË GJALLË .....	116
<b>LIRIKAT E FJETURA .....</b>	<b>117</b>
SI TRËNDAFILI .....	118
PËRJETËSI .....	119
ÇASTE .....	120
PËRTEJ PRITJES .....	121
PËRDITË .....	122
MALLI .....	123
ORË E VONË .....	124
NUK DUA .....	126
NJË DITË .....	127
LOZONJARE .....	128
LULËBARDHA .....	129
DËSHIRË .....	130
SI HËNA .....	131
KËNGË SKOFIARE .....	132
SORKADHES .....	133
<b>KUMBIM KËMBANASH .....</b>	<b>135</b>
ECJE .....	136
MOSHË DHE VITE .....	137
TË KËRKOJ .....	139
TË GJITHË .....	140
KËRKOJË FALJE .....	141
<b>SHËNIME PËR AUTORIN .....</b>	<b>143</b>
<b>PËRMBAJTJA .....</b>	<b>145</b>

**ISBN**

**Tirazhi**  
**200 copë**

**Formati**  
**120 X 190**

**Shtypur në shtypshkronjën**  
**Shkrola Print**  
**Prishtinë**  
**2013**